

西域考古錄卷第二

海月堂雜著

海鹽俞浩

湛持

西寧府

管縣三 西寧 碾伯 大通

管廳三 循化 貴德 巴燕戎格廳

禹貢析支雍州之域析支即賜支今府境西南皆古析支地也自秦漢以來羌胡所居昭帝元始元年分置金城郡今府界即金城郡地矣後漢獻帝末年分金城為西平郡屬涼州至晉張軌分西平置晉興郡張天錫以

西域考古錄

卷二

一

二郡遼澗又分為廣源郡呂光改西平為西河郡南涼禿髮烏孤自稱武威王徙都於此儁檀遷於姑臧後又移治樂都為乞伏熾磐所併後魏以西平為鄯善鎮孝昌初罷鎮為鄯州後周又置樂都郡隋初郡廢仍曰鄯州煬帝復改西平郡唐初復為州儀鳳二年置都督府後復為州元宗置隴右節度使統臨洮等十軍城綏和合州平夷三守捉使  
臨洮軍河源軍州西百二十里白水軍州西二百五十里安人軍置於星宿川振威軍州西三百里威戎軍酬三百五十里莫門軍洮州城內寧塞軍廓州城內積石軍廓州西百八十里鎮西軍河州城內

天寶改西平郡乾元仍爲鄯州上元初沒蕃大中收復  
五代之亂又爲西蕃所據號青唐城宋元符二年收復  
仍曰鄯州崇寧三年改爲西寧州仍建隴右節度使又  
改軍號曰賓德金因之元亦曰西寧州明改置西寧衛  
屬陝西行都司指揮使司  
國初仍爲西寧鎮亦設西寧衛碾伯所雍正初年改衛  
爲府置西寧碾伯二縣後又增設大通縣巴燕戎格廳  
貴德廳循化廳隸焉

顧氏曰西寧河湟環帶山峽紆迴扼束羌番屹爲重鎮  
西域考古錄

卷二

二

漢武使霍去病破匈奴因斥逐諸羌不使居湟中宣帝  
時趙充國留屯金城諸羌遠遁後漢建武中馬援平先  
零諸種時議者以金城破羌之西道遠多寇欲棄之援  
因上言破羌以西城多堅牢易可依固田土肥美灌溉  
流通如令羌在湟中則爲害不休不可棄也從之其後  
馬賢龐參往往樹積於此晉室南遷張氏撫有河西亦  
能和輯氏羌保其險阻呂光嚴刑峻罰河湟離畔晉隆  
安初禿髮烏孤屯據廉川羌酋梁飢攻後涼西平烏孤  
欲救之議者多以飢兵強爲疑趙振曰使羌得西平中

外震動非我利也烏孤曰飢得西平保據河山不可復制矣遂進擊飢破之於是據有嶺南之地楊統言於烏孤曰呂光衰耄諸子乖離若使浩亶廉川乘虛叠出不過二年姑臧可圖也烏孤從之後涼益困其後北涼西秦相爭逐於河湟間西秦之亡地沒於吐谷渾後魏復取之以爲秦隴藩蔽隋煬勤兵遠畧地斥四郡唐文皇平吐谷渾而地旋入於吐蕃開元中建雄鎮於州其時兵威震疊薄於海西天寶之後吐蕃乘安史之亂竊據河湟於是邠州之北鳳翔之西皆爲蕃戎之地馴至薄

皇畿犯京師其禍乃烈於東漢時之西羌及宣宗收復河湟而唐亦終不競矣宋關中戍守不越秦鳳熙寧以後始務遠畧圖河湟以制西夏乃議者謂河湟復而宋祚衰夫豈探本之論乎元起沙漠先事西域卒翦夏基遂置吐蕃宣慰司而領之以帝師西平亦其扼吭之地也明初置衛屯兵設茶馬司於此用以馴制蕃部云

湛持居士曰西寧居黃河下游爲五郡門戶南驅河曲北倚天山東控臨洮西通鮮水祁連旣宜於畜牧西海亦利於漁佃王韶言欲取西夏當先復河湟蒙

古火落赤嘗大言我但以偏師牽綴西寧銳卒直搗  
臨鞏則五郡皆我囊中物也彼有人焉顧其首不能  
用也然而明之得失可得而言也當明祖有天下之  
初以蕃俗獷悍欲衆建之以分其勢於是附近西寧  
巴沙巴哇申中申藏等十三蕃族各授官領印中納  
金牌茶馬諸蕃戀貢市之利且欲各保世職不敢爲  
非誠得禦戎之上策也洎武宗嗣位朝政日非達靼  
亦不刺諸部闌入河曲侵掠四衛久之遂據青海諸  
番爲所賤殺邊將圍視而不能援豈惟西寧有齒寒

西域考古錄

卷二

四

之懼卽張掖武威迄無寧日而當事者方痛飲於危  
牆之下清歌於漏舟之中苟非鄭洛招蕃田樂主剿  
則西寧已爲達靼游牧之場其不爲河套之續幾希  
夫青海一區昔之西海郡也河曲卽漢之大小榆谷  
唐之九曲地也自吐谷渾以來歷唐宋元明郡地之  
不登版曹者千餘年及明之中世一變爲蒙古至明  
之季世遂爲和碩特所據蓋明自正德以後河西五  
郡始有海寇之患我

朝開國之初經畧中原西陲諸部等之羈縻其小小寇

犯無歲無之康熙初年青海諸部蠶屯祁連山縱牧  
大草灘連結準夷役屬諸番右臂旣續河西各郡爲  
之困弊提督張勇請築扁都口西水關至嘉峪關邊  
墻以限內外及十四年王輔臣之變扇動諸部扁都口在  
甘州東南二百五十里甘州兵赴青海必出扁都敵自青海北行必假道扁都口入嗎力幹入  
據涼州之黃城兒勞藏寇紅崖殺遊擊取道扁都口  
入犯甘州皆以達賴刺麻檄諭而罷三十五年

聖祖親征噶爾丹遣使宣諭諸部集盟於龍駒島其明  
年青海諸台吉入覲京師詔封固始汗子達什巴圖

爲和碩親王餘授貝勒貝子公爵有差蓋至是青海  
始爲近藩五十六年各部護送裏塘達賴刺麻入藏  
從大兵戡定西藏詔留兵二千屯青海以備準夷及  
雍正元年我師平羅卜藏丹津於是令土爾扈特等  
五旗各自爲部不得復屬和碩特以分其勢以西寧  
辦事大臣蒞盟自此青海遂同內地爲不侵不畔之  
臣然而百餘年來以恬以處燕安起於無虞弊蠹生  
於悠久蒙古日以削弱番族日以強盛故西海諸部  
畏番人如虎狼防秋官兵昔之離番以制蒙古者今

乃衛蒙古以扞番盛衰之故雖曰天意亦人事有以致之而

國家之撫馭亦張弛隨之矣

西海在西寧府西三百里十三州志西海東去西平郡二百五十里水經注曰古西僊之地也亦曰零海亦曰青海亦曰卑禾羌海亦曰鮮水亦曰允谷鹽池西海以在黃河之西古曰僊海也狄鞮曰庫克諾爾庫克謂青諾爾則積水之名也鹽池在其西南狄鞮曰達布遜諾爾達布遜謂鹽也海方數百里漢元鼎四年先零羌與匈奴通攻令居圍枹罕遣將平之始置護羌校尉羌乃去湟中依西海鹽池神爵初酒泉太守辛武賢請擊罕开之在鮮水上者趙充國請治湟陁以西道橋七十所令可之鮮水左右元始四年王莽誘塞外羌獻鮮水海允谷鹽池置西海郡後漢永元中護羌校尉周鮪等擊滅畔羌西海及大小榆

西域考古錄

卷二

六

谷無復羌寇從隃麋相曹鳳言復西海郡縣治屯田植穀後涼楊軌為羌梁飢所敗西奔零海襲乙弗鮮卑而據其地隋書青海在吐谷渾中周回千餘里海中有小山以牝馬置此山生駒號為龍種其西十五里吐谷渾伏俟城在焉隋伐吐谷渾得其地縱牝馬二千匹於川谷以求龍種無效而止貞觀八年段志寧出西海道破吐谷渾既敗之於庫山乃中分其軍為兩道李靖與薛萬均萬徹李大亮由北道出曼頭山論赤水任城王道宗與侯君集趨南路歷破邏真谷人斲冰馬噉雪五月踰漢哭山進及烏海大破之李亮敗之於蜀渾山執失思力敗之於居茹川李靖督諸軍追至且末西聞可汗伏允在突倫川即圖倫磧將奔于闐契苾何力自選驍騎千人直趨突倫川磧中乏水將士刺馬血飲之襲破伏允牙帳斬首數千級獲雜畜二十餘萬伏允脫身走俘其妻子侯君集等由烏海至星宿川及柏海還與靖軍合遂平其地十二年吐蕃擊破之吐谷渾王諾曷鉢遁於青海

北龍朔二年吐蕃破吐谷渾屯青海威亨二年薛仁貴敗績於大非川在青海南儀鳳三年李敬元敗績於青海之上永隆元年黑齒常之敗吐蕃於良非川追破之青海二年贊婆畜牧於青海黑齒常之復掩破之萬歲通天中郭元振議以青海吐谷渾國家要地使吐蕃歸之以易四鎮十姓不果開元十四年悉諾邏掠甘州自積石軍西歸頓大非川涼州都督王君異追及之青海西乘冰而渡襲其輜重而還三十五年崔希逸敗吐蕃於青海西天寶初皇甫惟明破吐蕃大嶺軍又敗之青海五載王忠嗣與吐蕃戰於青海積石皆大破之七載哥舒翰築神威軍於青海吐蕃來攻擊敗之又築城於龍駒島時有白龍見因號應龍城明年以謫卒二千戍之冬冰合吐蕃大集戍者咸役自是以後中原多故青海為吐蕃所有設青海節度使以鎮之大中初吐蕃內亂河湟之地復入於唐其後吐蕃既滅族種分散無復統一宋建隆中首領尚波于獻伏羌地咸平中以六谷都首領潘羅支為朔方節度使使防禦李繼遷是歲攻西蕃

西域考古錄

卷二

入西涼府羅支偽降未幾集六谷諸豪及者龍族合擊繼遷繼遷中流矢死既而繼遷種落陰圖羅支遂為其所殺羅支弟廝鐸督代為首領遂以為朔方節度使於時西羌部屬迎响斯羅至河州於是宗哥立遵與邈川温逋奇佐之立文法因徙居宗哥城舊龍支縣地唐屬鄯州邈川者唐鄯州之樂州在今西寧東南二百里又有溪哥城者舊積石軍也宋復得以為積石軍者也立遵佐响斯羅甚有威名屬上表求為贊普真宗曰贊普戎王之號立遵方佐响斯羅其可與乎乃授以保順軍節度使後温逋奇謀亂响斯羅殺之而改莅青唐會元昊以兵來襲响斯羅堅壁不與戰元昊渡水嘗植幟以志淺深响斯羅潛使移所植及元昊眾潰趨志處溺死過半自是數以計敗元昊而并厮鐸督之眾十餘萬回紇亦以數萬歸焉其勢遂強於諸羌治平初卒三子皆被恩命曰瞎瑄居龕谷曰磨瑄居宗哥城曰董瑄嗣為保順軍節度使西蕃邈川首領熙寧中王韶復洮河二州瞎瑄子木征降賜姓名趙思忠神宗討西夏董瑄集六部族

兵十二萬分三路與大軍會拜河西節度使封武威郡王以其養子阿里骨為肅州團練使董彊將死名諸族首領至青城謂曰吾一子已死惟阿里骨母掌牟瞎通事我當以種落付阿里骨諸首諾之既死阿里骨遂居青唐元祐元年以為河西節度使西蕃遜川首領二年迫其將鬼章據洮川又進築安鄉踏白城種誼破其城生禽之阿里骨復歸歛詔瀚雪其罪及死子瞎征承襲久之國人不順迎董彊兄子溪巴温立之朝廷命王瞻招納瞎征歸朝乃度河攻據遜川以重兵臨之巴溪温死子隴拶亦出降賜姓名曰趙懷德吐蕃諸首領復立隴拶之弟溪賒羅撒趙懷德還遜川溪賒羅撒與其黨謀掩殺之懷德遂奔河南事聞遣童貫將王厚等至京玉關遂拔湟州會兵宗哥川與戰敗之其酋開門出降詔更鄯州為西寧州至靖康之變金人陷陝西六路熙河守帥乃求青唐種族以湟鄯地與之元平西域降高昌滅西夏青唐諸首領納土歸歛元仍置西寧州而青海南北兩路猶為吐蕃所據今之十三族皆其種類也明有

西域考古錄

卷二

八

天下中馬易茶諸族安土守法百年之間未有邊患及正德後連寇集於青海而其患遂中河西論者常為西顧之憂云

大積石今名雪山蒙古名木素鄂拉在今青海上土爾扈特南前旗黃河之南阿里克土司之東今黃河自羅布淖爾伏流至噶達素齊老山復出為阿勒坦河東流穿鄂敦他拉海而東瀕為札凌海又東為鄂凌海折而南逕蒙古爾津土司又東逕積石山南即水經所謂東南流入渤海又出海外南至積石山下有石門之文也詳見余所作大積石山考



土樓山在府西北隋志謂卽四望山也漢神爵元年趙充國至金城渡河遣騎候四望陁中無人夜引軍上至落都喜曰吾知羌不能爲軍矣使發數千人守杜四望陁中兵豈得入哉又峽口山地極險阻爲湟鄯往來咽喉卽漢書之湟陁充國屯田奏言治陁以西道橋七十所令可至鮮水左右是也唐人嘗修閣道宋築省章城於此名綏遠關在府東南

拔延山府南二百里故隆化縣境與連雲山接隋大業五年帝大獵於拔延山長圍亘二十餘里是也

西域考古錄

卷二

九

車我真山府西南六百里大業五年煬帝追吐谷渾可汗於覆轅川分命元壽南屯金山段文振北屯雪山楊義臣東屯琵琶峽張壽西屯泥嶺四面圍之伏允潛遁遣其名王詐稱伏允保車我真山是也

又曼頭山吐谷渾中最著者宋泰始六年魏主宏遣其將長孫觀西擊吐谷渾王拾寅敗之於曼頭山大業四年宇文述出西平至臨羌城進拔吐谷渾曼頭赤水二城因於赤水城置河源郡兼領赤水遠化二縣謝氏謂改曼頭城爲遠化縣也考隋志赤水管下有曼頭城又

別見遠化則改縣之說謝氏不知何據也又貞觀九年李靖部將薛孤兒敗吐谷渾於曼頭山劉昫云隋置河源郡有曼頭城城因山名也曼音萬

赤嶺府西三百二十里續通典石堡城西三十里有山土石皆赤北接大山南連雪山號曰赤嶺自鄯城縣西行二百餘里卽赤嶺也劉元鼎曰過石堡城西行數十里土石皆赤名曰赤嶺卽此後魏宋雲等奉使西域自洛陽行四千里至赤嶺乃出魏境見伽藍記亦此嶺也又儀鳳三年婁師德使吐蕃吐蕃迎之於赤嶺開元十

西域考古錄

卷二

十

九年吐蕃請交馬於赤嶺互市於甘松宰相裴光庭曰甘松中國之阻不如許赤嶺乃聽以赤嶺爲界表石刻約二十二年又立碑於赤嶺分唐與吐蕃之境二十六年命河西隴右分道經畧吐蕃碎赤嶺碑天寶八載哥舒翰克吐蕃石堡城復以赤嶺爲西塞蓋中國與吐蕃分界處也考其地當在西寧縣西鎮海堡邊外綽羅斯輝特二旗境也

大小榆谷考通鑑注大小榆谷卽唐之九曲在積石軍西二百里宋史地理志積石軍北至西寧八十里則榆

谷當在今之貴德廳西水經注河水自河曲逕西海郡  
南下注引十三州志龍夷城在臨羌新縣西三百一十  
里王莽西海郡治此當在今青海南又東逕允川而歷  
大榆小榆谷北是也後漢建武中燒當羌滇良集諸種  
擊殺先零奪居大小榆谷章和末護羌校尉鄧訓發兵  
掩擊迷唐於寫谷羌乃去大小榆谷衆悉離散永元四  
年聶尚代鄧訓招迷唐等復居大小榆谷迷唐遂畔寇  
金城塞五年校尉貫友攻迷唐於大小榆谷破走之因  
作河橋於逢留大河以度兵十一年迷唐降入居金城

西域考古錄

卷二

十一

詔將其種人還大小榆谷迷唐以漢作河橋兵來無常  
辭不肯徙叛還賜支河曲十四年以迷唐衰息從曹鳳  
言屯田二榆永初中以羌亂罷自晉以後常爲諸羌所  
據後周逐吐谷渾復收其地煬帝築長城自榆谷以東  
禦吐谷渾也通鑑注景雲中吐蕃請九曲地都督楊矩  
奏與之吐蕃置洪濟大莫門等城又置獨山九曲兩軍  
以守其地地旣肥饒吐蕃就之畜牧因以入寇矩悔懼  
自殺開元二年宰相姚崇等奏頃者吐蕃以河爲境神  
龍中尚公主遂踰河築城又於河上造橋今吐蕃旣叛

宜毀橋拔城從之五年郭知運大破吐蕃於九曲十五年蕭嵩破吐蕃於渴波谷追拔其大莫門城焚其駱駝橋天寶二載皇甫維明攻洪濟城克之王倕又破其魚海遊奕等軍十二載哥舒翰攻洪濟莫門取之盡收九曲地奏於其地置澆河洮陽二郡及神策軍以臨洮守兼充軍使及洮陽守焉考洪濟本後周之洪濟鎮吐蕃就故城修築之也又儀鳳初於洮州城置莫門吐蕃遂加大以稱之耳通鑑注洮陽澆河二郡皆置於洮廓二州西南廓州本澆河郡天寶元載更名寧塞郡洮州西西域考古錄

卷二

三

八十里磨環川置神策軍元和郡縣志謂在洮河南岸是也又有寧邊軍在積石軍西黃河北威勝軍在積石軍西八十里宛肅亦曰宛秀軍金天軍在洪濟橋武寧軍在洪濟橋東南八十里百谷城耀武軍在州南二顯黑硤川卽水經注之黑城谿也當在今循化廳南按此諸軍皆十三載哥舒翰奏置者

落都谷舊唐書地理志浩亶縣有雜都谷卽趙充國傳之落都也永平初馬武擊燒當羌敗於落都谷是也在今碾伯縣境中又三兜谷卽漢護羌校尉傳育討羌迷

吾爲所襲殺處舊志在臨羌縣西南通鑑注在建威縣  
今在西寧縣西鎮海堡外又木乘谷漢張紆屯臨羌迷  
吾犯金城塞遣從事司馬防戰於木乘谷敗之當在今  
鎮海堡外又長寧谷卽水經注之長寧水東南流逕晉  
昌城城在今西寧縣土司境長寧川水出松山蒙古謂  
之阿爾坦阿林當今大通縣南土司境卽松山也隋大  
業中帝自拔延山入長寧谷度星嶺然後至浩亶川是  
也星嶺有吐蕃所築帶星嶺城晉析臨羌縣置長寧縣  
亦以長寧川名之後魏廢水經注西平城西北四十里

西域考古錄

卷二

三

有長寧亭蓋在今縣西北北川土司境內長寧水今謂  
之北川河至西寧縣西北入湟水自南川至北川皆有  
邊牆高不過三五尺低者童子可踰也北川有守備營

在新城堡東南至西寧縣八十里

紀畧曰北川營乃總堡名渡河二里爲毛

家寨東十里上馬圈堡又東五十里威遠堡皆內地也西踰大山六十里爲刺鏢麥力幹住牧皆外地也東西閣門在營北十里順治戊子叛回俱以此爲逋逃藪及漢人之亡命者咸萃焉築室耕田牛種取給於麥力幹歲添巴有等差若屯田其田皆肥沃百數十里村堡相望苟有中行說輩如河套之板升其爲害豈淺鮮哉西寧之可慮者不在斯乎

牛心堆水經注湟水又東牛心川水注之牛心川水出

西南遼山東北流逕牛心堆東通鑑貞觀九年李靖敗吐谷渾於牛心堆考牛心川水出西寧縣西南土司境內今謂南川河有南川口營東至西寧縣三十里其西四十里卽大康纏又西二十里爲小康纏萬歷中巡撫田樂檄副將達雲與海夷戰於閘門申中族尾夷至閘門外斬級甚多復與西寧官兵犄角破之大康纏海氛頓息紀畧南川口乾河等山口俱有舊邊循牆挑濠斬斷山厓築砌石臺以備夷騎刺撒西林尤爲要害北十里卽銀塔寺寺有菩提樹俗呼千佛樹又謂之寶貝佛海夷達賴黃台吉以金銀葉裹樹每歲六月番夷全集於寺至此者北由北川閘門西北由鎮海多巴西由西石峽西納川口東南由南川口寺北至鎮海營十

西域考古錄

卷二

十四

里鎮海營者茶馬互市之通衢也東距西寧南連銀塔北近多巴接北川西踰黃河通石峽蓋青海西川大通有夷住牧以是爲西寧門戶焉欵於斯戰於斯由來久矣考營之初制距青海四十里卽漢西海郡故城修築中葉移置於此其時罕東四衛已被侵掠藩籬旣破欲不遷得乎在昔夷勢雄張十三族無不納添巴者所謂隔斷羌胡曾不若折柳之可懼狂且也嘻甚矣不能自治也於彼又烏足責乎

巴煖三川十八堡之總名也東南連河州東北接蘭州西北走碾伯大河東限小文西控大通流其北延袤二百里平原築堡臨壑附巖則置寨俯流則甃石山巔平則削四壁續斷垣於山上爲城可耕可牧可守然漢土雜居羌回環處沿山西行直趨湟中皆人跡不到之區

也其北百三十里為古鄯驛唐鄯城縣舊治也河湟孔道南障雪山東連番族重岡複嶺路通兩峽自是而西皆湟中大路蓋萬山深處也考元和郡縣志儀鳳二年分湟水縣置北枕湟水西即土樓山有土樓神祠紀畧三川十八堡明副使及官所築其地逼近黃河有明於三川之大山下閻門起鹹水溝止濬築邊壕有分水嶺東南之水經美都溝引溉三川其嶺北之水經巴煖川趣大通河焉故梨棗成林膏腴相望其地水草甚美明設宗水監四院曰永川曰黑城曰清水曰美都三川其孳牧土人皆李土司部人三川有遊擊西北至西寧縣二百五十里古鄯驛為河州西寧大道其東皆番族語言不通非土人鮮問津焉馬營寺為刺麻住持驛東七十里是也西寧巴川三十里巴川堡皆土人所居治土司所轄分水嶺之水經紐東溝米刺溝而至巴川溉田甚廣

西域考古錄 卷二

五

土人自守倍於兵民漢人無居此者山高而地隘也西二十里曰黑山又十里為下川口又西北二十里至李土司所居之上川口五十里之中險阻倍常車不能方軌人不能成列耕墾山田高高下下引導水源無旱涸之虞故土人皆勤於稼穡殖穀守法有古風焉考上川口土司明初李南哥率眾來歸使之招番討叛叛有功賜鐵券虎符相傳本沙陀朱邪赤心之後今其所轄土人皆精銳勝兵者萬人其地南接巴川堡西接虎刺害北限大河東通省會高山大谷可四達也

老鴉城本漢破羌縣故城屬金城郡晉廢永初三年叛羌攻沒破羌縣城即此東至西寧百八十里今廢為驛漢土雜居東接上川口西抵瞿雲寺南面湟而北負山

亦湟中設險之地也

湟水漢志臨羌西北至塞外有西王母石室仙海鹽池  
北則湟水所出酈氏水經注湟水出塞外東逕西王母  
石室石釜西海鹽池北仙海卽青海今湟水出青海東  
北實不逕青海鹽池之北漢志北則湟水所出蓋指縣  
北言之與上西北至塞外一例非蒙上僊海鹽池也酈  
氏引漢志偶失檢耳魏王括地志湟水一名樂都水來  
自牛心堆經四望山陽東至允吾入河湟水左右地皆  
肥美漢武開河西四郡隔絕羌與匈奴相通之路斥逐

西域考古錄

卷二

六

諸羌不使居湟中地是也其後元康四年先零豪言願  
時渡湟水北逐民所不田處畜牧自後遂抵冒渡湟水  
欲結匈奴絕漢道趙充國擊平之一統志湟水今不經  
見衛城北北山之陰有蘇木連河疑卽湟水云元圖經  
湟水出祁連山下東流合浩疊河皆非是詳見第一卷  
狄道州下湟水考

浩疊河今口大通河出青海西北山曰阿木尼厄庫阿  
林水曰烏蘭木倫必拉當安西州東境之直南自青海  
西北東流逕和碩特前左翼頭旗北又東逕和碩右翼



前旗南又東逕和碩特東上旗北又東逕大通縣南又  
東南逕碾伯縣東平番縣西又東南逕莊浪廳西南碾  
伯縣東南入湟水大通縣以下爲漢浩疊允吾二縣境  
故漢志云浩疊水出浩疊西塞外東至允吾入湟水水  
經注閤門河入塞逕敦煌酒泉張掖南蓋肅州甘州南  
境邊外爲青海北境也又經西平之鮮谷塞尉故城尉  
城今不可考又合湛水逕養女北山合南流川水又東逕浩  
疊縣故城南又東流注湟考元和郡縣志浩疊故城在  
廣武縣西南一百三十里允  
吾故城在廣武縣西南一百六十里是水  
流二縣間也當在今平番縣西南土司境朱思本云浩  
疊水出剛丹州南剛丹山下東南流七百餘里合湟水  
而注於黃河大業五年伐吐谷渾至浩疊川以橋未成  
斬都水使者黃亘等數日橋成乃行

西域考古錄

卷二

七

西寧縣附府本漢破羌縣地屬金城郡魏分置西都縣屬

西平郡隋罷郡屬鄯州開皇十八年改爲湟水縣唐因  
之舊書地志武德二年置鄯州治故樂都城似以後周  
樂都郡治而名也後沒於吐蕃謂之青唐城宋元符二  
年洮西安撫使王贍收復仍置湟水縣焉元爲西寧州  
治明改衛不置縣 國初因之雍正中改府卽舊湟水

縣置今縣

今考元和郡縣志後漢獻帝立西平郡後魏於此置鄯州郡當為州屬今本魏書地形志鄯州下缺隋唐鄯州治湟水縣在西平故郡東儀鳳中分湟水置鄯城則與故郡相接元和郡縣志湟水縣本破羌縣地土樓山在縣西百三十里鄯城縣東至州一百二十里北枕湟水西即土樓山以水經注土樓在西平亭東北五里推之則土樓正當故郡之北鄯城在東其地相接太平寰宇記鄯城縣西平故城在今縣西一百三十二里者蓋由湟水縣言之猶元和志土樓在鄯城之西而湟水縣下猶云在縣西一百三十里皆誤錄舊圖經之文未及改正也輿地廣記鄯城縣唐沒於吐蕃皇朝收復改為西寧州是宋之西寧州城為唐鄯城縣非隋唐鄯州治州城之西即與西平故城相屬今西寧府治即宋之州城明之衛城陝西行都司志謂自衛城西至南迤東約八里餘乃古西平郡城信矣一統志衛城西南有西寧廢城宋置州於

西域考古錄

卷二

六

此元移今治云云殊乖謬不可據從來官書之謬未有如大明一統志者也顧亭林所摘特北直隸數州縣其他未經勘定者尚不知凡幾也

安夷川水經注湟水又東安夷川水注之安夷川水發遠山西北流控引衆川北屈逕安夷城西北東入湟水此安夷城在湟水南即故城也二漢志俱屬金城郡晉志屬西平郡禿髮利鹿孤鎮安夷蓋即此城後廢其新安夷城自在湟水北安夷之廢地志不詳後魏所置之新安夷亦屬鄯州但今本地形志鄯州下缺無從考耳據水經注宜春水西南流至安夷城南入湟推之蓋即

新安夷矣故城當在今碾伯縣西明西寧衛志以衛東

七十里之平戎驛當之約畧近之紀畧平戎驛南北皆夷也南極石札巴北

盡紅崖溝南北百里皆為綏服西寧孔道不絕如綫幸

而土番雜居有守望相助之風趙充國奏墾屯田二千

頃即在此處大峽口在東小峽口在西四十里小峽即

漢湟陜道宋之省章城及綏遠關皆去此不遠控制咽

喉於是乎在而皆不聞有一成一旅之番代相戍豈以

甌脫視之哉平戎驛西至西寧縣四十里西寧孤懸天

末其得失每在五郡之先般繁輻湊不但河西莫及雖

秦塞猶多讓焉自漢人土人而外有黑番有回回有西

夷有黃衣刺麻而番回特衆豈非互市之故哉城之中

驟牝常以萬計四方之至四境之牧不與也羽毛齒革

珠玉布帛茶煙米豆之屬負輦駝載交錯道路昔人所

謂舉袂成雲揮汗如雨雖帶甲五千足以控制岩壘然

奸每生於防閑之日亂恒伏於不見之間則利為之階

也而西寧之最關利害者尤以西川口為今日扼要之

西域考古錄 卷二

九

地西川口者東至西寧縣五十里南至銀塔四十里北

至北川口七十五里西至湟河一里踰河即多巴西石

峽在西二十里西海則三百里也西川口土司西和之

所居也東西二和所轄土民各號十萬所居為三和寨

西寧之固我圍非李和二土司而誰耶效命之賞未行

苞苴之索未已其何以服土人之心哉多巴豈非內地

而顧任夷之壘斷哉

碾伯縣府東北一百二十里舊湟水縣地或曰前涼樂都城也考

水經注湟水又東逕樂都城南東逕破羌縣故城南漢

書趙充國傳夜引兵至落都即樂都也後涼有樂都太

守田瑤則都乃呂氏所置也南涼禿髮烏孤大城樂都

而居之其後乞伏熾磐襲樂都梁肅以外城廣大難守

請聚國人守內城不聽城潰熾盤入樂都置涼州刺史  
鎮焉後魏置鄯州領縣缺不可考隋唐爲湟水縣地諸  
志皆以樂都爲今碾伯縣治而後漢書注輿地廣記皆  
言破羌縣故城在湟水西與水經注先逕樂都後逕破  
羌者不合當以麗注爲是二城蓋相近也紀畧西寧在  
湟水南碾伯  
在湟水北互爲形援亦黃河之襟要焉其地東接老鴉西連威遠南趣南林北抵勝番也明置碾伯  
守禦千戶所雍正中升縣

勒且嶺水經注勒且谿水出縣東南勒且谿流逕安夷  
城東而北入湟水十三州志金城安夷縣東有勒且河

西域考古錄

卷二

二十

與金城河合勒且嶺勒且河所出也蓋漢時勒且羌所  
居沮渠蒙遜敗西秦兵於浩亶熾盤遣將折斐等據勒  
且嶺邀其歸蒙遜擊禽之是也且通讀子按勒且谿  
水在今碾伯縣西南又其東有期頓鷄谷

掌吉兒壑峴碾伯縣西二十里兩山削立中通一騎西  
風起則峴中水六月可冰其地西趣青海北由他共石  
至西大通峴無居人番族之游牧者或一至焉

大通縣

府西北二  
百四十里

因大通河名縣河卽浩亶河一曰閭

門河與蘭州境內之閭門河異源而同名縣與莊浪廳

之大通堡接壤自西寧至北川營九十里而抵白塔兒  
白塔爲商胡走集之地狐貉舍利鹿麋羊羔之皮金剛  
鑽鑽鐵琅玕玉石五色瓊屬多羅瑣伏香牛皮撒黑刺  
阿魏苦朮吟刺各種蒲萄驢馬駒駱橐駝犛牛犏牛牦  
羊羱羊捆載而麇集於此又西北卽大通新縣自改莊  
浪衛爲平番縣屬之涼州而西寧復有新縣之置除兩  
地之伏莽祛百年之隱憂嚴門戶而肅堂奧一縣之設  
賢於十萬甲兵矣昔之議者謂莊浪兵宜防礮伯而西  
寧兵宜番戍古浪以防全口鎮羌誠以西寧莊浪相脣

齒自新縣設而涼莊亦有重門擊柝之警庶前議可置  
而民獲安枕矣考元和志浩亶故城在廣武縣西南一  
百三十里允吾故城在廣武縣西南一百六十里今大  
通正經流於浩亶允吾二城之間今縣亦古浩亶允吾  
二縣地也謝氏謂大通縣本宋時董種所置之達南城  
形勢險要扼制夏境宋崇寧收復湟鄯於此築城賜名  
大通考之紀要及衛志則宋城在西寧東南屬樂川其  
東四十里接河州之通津堡則當在西寧東南之古鄯  
驛去西寧二百六十里謝氏偶失考也又考樂川卽樂

州吐蕃之邈川城是也祥符中唃斯羅自宗哥城徙居邈川元符二年宋師自河州趣邈川降之因置湟州置邈川縣爲湟州治宣和改樂州金廢其西南百四十里卽來賓城南去大河十里亦崇寧中築者也

宋志通津堡河州西北至西寧之大通故城四十里

南百六十里本番境之達南堡西  
養女川水經注水發養女北山有二源皆長湍遠發南總一川逕養女山謂之養女川今青海和碩東上旗東北有水曰布庫克必拉出北山曰沙拉克圖阿林其水東南流右合一水曰沙庫克必拉出和碩特南左翼末

西域考古錄

卷二

三

旗東北山曰察罕鄂博圖阿林所謂水有二源皆長湍遠發也自沙拉克圖阿林至阿爾坦阿林皆重山繇亘當大通縣西南諸土司境北至大通河南抵西寧縣水經注引十三州志所謂浩疊山卽西平北山也今北川河東西二水至西寧縣西北相合是也

東川在碾伯縣西一百里川地寬衍水甘草美永樂中於此置廣牧監而築威遠堡以扞衛司牧考陝西明時二監八苑二監者甘泉祁連也八苑者廣牧麒麟紅崖溫泉西寧大通永安古城也陝西六監莊浪一甘州一

西寧有其四焉煖川與三川各一而東川有其一焉川地雖廣而隘口獨多黑松峽南至西寧一百里兩崖壁立中有通道川北二十里曰爾閣隆寺莊嚴宏麗永樂中建以居青海法王者今寺中刺麻衆至二三百人左右旃帳皆黑番也閹門咫尺卽屬要荒有地方人民之責其能不加之意乎

貴德廳

府西南二百九十里

本吐谷渾澆河郡地也通典晉吐谷

渾阿豺所築水回湫曰澆城蓋置於澆河回曲處晉隆安二年禿髮烏孤拔龍耆堡梁飢單騎奔澆河旣而澆

西域考古錄

卷二

三

河太守王稚以郡降於烏孤明年烏孤使其叔吐若留鎮澆河宋元嘉三年乞伏熾盤爲夏所侵徙其境內老弱畜產於澆河後魏亦爲澆河郡延興三年吐谷渾王拾寅寇澆河郡使長孫觀擊降之尋廢唐天寶十三載隴右節度使哥舒翰奏請以所開九曲池置澆河洮陽二郡是也新書地志澆河郡置於積石軍西當卽故澆河城也而杜佑以謂城在賀蘭山下謬矣考段國沙州記隋書經籍志宋新亭侯段國曰澆河西南一百七十里有黃沙沙南北一百二十里東西七十里西極大楊川沙州於是

取號焉北史吐谷渾傳部內有黃沙周廻數百里不生

草木吐谷渾阿豺自稱沙州刺史卽此水經注河水右

逕沙州北亦此沙州也晉書地理志前涼以敦煌西域

今安西州界中之沙州也元和志張駿於敦煌置沙州

蓋因鳴沙山爲名流沙卽居延澤也以西胡校尉楊宣

爲刺史後魏改爲瓜州唐武德五年改瓜州爲沙州別

於晉昌置瓜州焉此沙州自在敦煌不爲河水所逕河

水所逕之沙州諸地志並無記載今考西秦錄乞伏熾

盤以沙州刺史魏景鎮西平通鑑呼盧古等攻沙州刺

史出逕處於湟河是當時西平湟河諸郡皆屬沙州卽

河水所逕之沙州又乞伏氏所移置也蓋自義熙六年

伏乞乾歸克姚秦畧陽南安隴西諸軍日以強盛及太

子熾盤嗣立伐吐谷渾破之俘獲五千餘口吐谷渾王

樹洛干奔保白蘭山而死熾盤聞之喜曰此虜矯矯所

謂有豕白駒者也今奸凶已殄境宇漸清吾無患矣熾

西域考古錄卷二

盤當宋元嘉時段國同時人國撰沙州記曰洮水出強

臺山澀臺卽西傾也故洮水亦兼有強川之名以其西

接黃沙謂之沙澀其沙周回數百里都不生草木蕩然

黃沙望之若人委乾糶於地其東則爲洮澀自洮澀南

北三百里中地草徧是龍鬚而無樵采鄜氏又引班志

漢宣帝神爵二年置河關縣今本漢志無此文蓋脫簡

也國所著記中有吐谷渾河橋有堊江源則今貴德廳

循化廳以南諸番界直接松潘廳北境皆當時沙州地

記又有臨洮城臨洮與枹罕西秦同屬隴西郡以記言

之則是時北河州雖鎮枹罕而臨洮則屬沙州矣今人

但知敦煌之沙州不知有河水所逕之沙州賴北史及

鄜注猶可考證其治當在今貴德廳西所治之城已不

可考詳釋鄜注似卽漢之河關縣按晉書地理志西平

郡領西都臨羌長寧安夷四縣元和郡縣志後漢獻帝

分金城置西平郡後魏以爲鄯善鎮蓋在河水北界今



自貴德廳以北皆西平郡地又曰南涼禿髮烏孤以西平河南地爲澆河郡下注云有二城東西角相倚東北去西平二百二十里太平寰宇記廓州北至鄯州一百八十里達化縣廓州西三十里澆河城在達化西一百二十里則正當今貴德治矣元史地理志都實河源記貴德州在積石州西一百五十里今之廳治蓋因元舊治襲其名而以州爲廳也一統志廢貴德州在積石西南元置州於此隸吐蕃等處宣慰司至元十七年都實窮河源自崑崙還至貴德州約半月程地名必赤里始有州治官府又四五日至積石州

西域考古錄

卷二

三五

循化廳

府東南三百四十里

本漢白石縣地前漢屬金城後漢屬

隴西郡十三州志白石城在狄道縣西北二百八十里  
有白石山在其東因名晉廢張氏復置屬晉興郡改爲永固縣後魏廢李軌復置屬河州唐廢改置烏州十一年州廢置安鄉縣仍屬河州天寶改鳳林其地有鳳林關咸通中尙延心獻欵高駢收鳳林關元和志鳳林本白石縣地後魏大統十二年刺史楊寬於河南鳳林川置鳳林縣因以爲名儀鳳元年於河州西移安鄉縣理此又名安鄉天寶元年改名鳳林九域志廓州東南至

安鄉城二百八十里是也

巴燕戎格廳府南四百里本前涼臨津縣之白土城地晉書

地理志金城郡有白土三國志正始九年叛羌屯河關白土故城則漢末已爲故城矣顧氏謂晉省曹魏置者不知何據水經注引十三州志左南津西六十里有白土城城在大河之北爲緣河津渡處其西北有白土川因名酈注土白川水出白土城西北下東南逕白土城北又東南注於河前涼張天錫討畔將李儼於隴西使掌據向左南張統自白土卽此後涼呂光置三河郡治

西域考古錄

卷二

三

白土縣乞伏熾盤攻南涼三河太守吳陰於白土克之後魏郡縣俱廢十三州志石城西百四十里有左南城河水經其南曰左南津當今巴燕戎格之東舊志云在白土城東六十里信矣晉書載紀張瑁從左南渡河襲麻秋軍蓋與白土城同爲河水津渡處也近日新志之無稽者如以西寧爲廣威以碾伯爲浩亶以大通爲興城以貴德爲河陰以循化爲化城是也元和郡縣志米川縣西至鄜州一百里本後魏廣威縣水經注河水又東北逕黃河城南又東北逕廣遠城北張猛龍頌有黃

河太守諸書無黃河郡蓋遼河郡之異文也太平寰宇  
記引周地圖志云遼河郡後魏太平真君十六年置屬  
鄯州今本地形志鄯州下郡縣俱缺酈注稱黃河西北  
去西平二百一十七里當在今巴燕戎格西境廣遠亦  
廣威之異文也通典以石城縣當之非應從元和志爲  
是當在今循化貴德二廳閒也興城通鑑注在允吾之  
西南白土之東以今大通縣當之則謬矣又化城縣卽  
石城縣與今之循化懸殊幾三百里矣河陰之爲貴德  
尤不可解河湟諸郡縣漢以後無名河陰者惟碾伯與  
西域考古錄

卷二

七

浩壘方位差近耳夫地理沿革所關甚鉅搜考未徧姑  
置闕如可也豈可鄉壁虛造貽惑方來哉

晉興故城在碾伯縣南晉書地理志永寧中張軌表請  
分西平界置晉興郡蓋治浩壘張駿又分置興晉等郡  
徐氏謂小晉興蓋卽晉興郡治之晉興縣猶沛郡沛縣  
之爲小沛也後魏廢水經注引闕駟說城在允吾縣西  
四十里是也後又譌興晉爲晉興乞伏熾盤以王基爲  
晉興太守鎮浩壘隋志浩壘縣後周并入湟水卽此  
臨羌故城在府西二百八十里漢縣屬金城郡在故浩

亶縣西趙充國傳西至西部都尉府卽臨羌城矣水經注羌水出湟中西南山下經護羌城東故護羌校尉治也又東北逕臨羌城西是護羌校尉常治臨羌西界也酈注引十三州志臨羌新縣在郡西百八十里龍夷城在臨羌新縣西三百一十里故縣新縣中隔湟水相去不遠西平郡卽今府城以道里約之臨羌城東至今西寧縣幾二百里出邊外百里西去西海郡幾三百里也當在今鎮海堡邊外輝特旗之東北圖爾根察罕必拉卽羌入湟水處水也

西域考古錄

卷二

天

龍支故城府南百三十里本漢允吾縣地後魏置北金城於此西魏改龍支縣以縣西南龍支谷爲名屬涼州唐改屬鄯州儀鳳三年鄯州都督李敬元奏敗吐蕃於龍支是也後沒於西蕃號爲宗哥城宋唃羅斯相李立遵居宗哥城卽此崇寧三年王厚復湟鄯進軍宗哥川羌置陣臨宗水倚北山厚麾騎登山攻其北而親帥強弩迎射羌走分軍踰水擊之遂降其城進下青唐入廓州是也宋志宗水來自青海下流入湟水水南有宗谷口譌曰宗哥吐蕃以名其城方輿紀要譌龍支爲龍耆

考龍耆城卽龍夷城其城在青海卽河水所逕之西海郡也後漢書永元中曹鳳請收復西海郡將徒士屯龍耆水經注作龍夷城耆夷蓋聲之轉也其城當在今蒙古遊牧之地與龍支東西相去幾三百里矣顧氏最博雅偶失檢耳

湟中城亦曰小湟中通鑑注湟水兩岸之地通謂之湟中湟中城置於西平張掖閒本小月氏之地因謂之小湟中後漢永元初鄧訓擊迷唐羌發湟中卒縫革爲船置於箬上以渡河掩擊迷唐大破之永初末羌豪麻奴

西域考古錄

卷二

无

等復據湟中屢侵金城武威諸邊郡延光中校尉馬賢討破之建安十九年夏侯淵討宋建遣別將張郃渡河入小湟中是也當在今青海東湟水南也

廉川城晉太元二十年秃髮烏孤擊降乙勿折掘等部築廉川堡隆安二年楊軌屯廉川收集夷夏衆至萬餘旣而降於烏孤烏孤使從弟洛回鎮廉川其後爲北涼所取後魏廢通鑑注廉川在湟中是也

廓州城府西南二百五十里古西羌地晉隆安中秃髮烏孤於河南地置澆河郡後周於其故城置廓州以開

廓邊境爲義隋煬復爲澆河郡武德中仍置廓州考元和郡縣志澆河有二城東西角倚東北去西平二百二十里又云積石軍在州西南百五十里儀鳳二年置西臨大澗北枕黃河卽隋澆河郡所理太平寰宇記澆河郡在達化縣西百二十里與元和志合天寶中於九曲地置澆河郡通鑑注謂郡置在積石軍西卽故澆河城也通典曰澆河城吐谷渾所築蓋置於澆河回曲處延熹中燒當結澆河大豪寇張掖段熲擊斬澆河大帥於其地遂定西羌胡氏曰澆河古西羌所居地詳繹數說

則澆河之名見於漢而置郡則自吐谷渾始隆安中澆河太守王稚以澆河降於烏孤卽吐谷渾所置之城其後烏孤又移澆河郡於河南地耳隋書地理志廣威縣下云西魏置澆河郡於此後周廢河津縣下云後周澆河郡領澆河廣威安戎三縣隋初改置河津縣爲廓州治廓州下云建德五年於達化郡達化縣界澆河故城置廓州云云夫一志之中忽廢忽置刺謬如此千百年後又何所適從乎考隋志達化縣下開皇三年罷軍移縣入郡解卽今縣也開皇初吐谷渾寇廓州州兵擊走

之胡氏曰澆河郡亦周逐吐谷渾以置廓州以諸志證之史文則其併省增置亦可推見厓畧阿豺始置澆河前涼時有湟河郡無澆河郡北涼西秦有湟河有澆河澆河一遷於烏孤再遷於隋廓州之治亦屢易其地蓋地屬邊方朝胡暮越得失無常此如南北朝僑郡大抵然矣隋開皇初河南道行臺尚書楊尚希曰竊見當今郡縣倍多於古或地無百里數縣並置或戶不滿千二郡分領具僚已衆資費日多吏卒增倍租調歲減民少官多十羊九牧今存要去閑併小爲大國家則不虧粟帛選舉則易得賢良蘇威亦請廢郡從之於是悉罷諸郡爲州以此推之則當日之弊大概可知矣先待御公鐸在順治初年以秦晉豫數省之間千里蕭條人烟斷絕建議併省州縣於衝要之地設

西域考古錄

卷二

三

兵置官以招徠民戶開荒耕種俟將來十年二十年之後生聚滋多另議添設時善其言而不能行也

河源郡府西南隋大業四年伐吐谷渾置河源郡治赤水城唐儀鳳二年復置河源郡於鄯州西百二十里管兵一萬四千馬六百五十三匹永隆初大使黑齒常之以河源衝要欲加兵戍之而轉輸險遠乃廣置烽戍七十餘所屯田五千餘頃由是戰守有備乾元初沒蕃大中初吐蕃尚恐熱謀并鄯州率兵至河州尙婢婢軍河源以拒之諸將欲戰婢婢不可諸將不從乃據河橋以待之諸將果敗婢婢收餘衆焚橋奔歸鄯州蓋與河州

接界通典在鄯州西百二十里當在鄯城縣界新志以古鄯驛謂卽唐之鄯城縣治按元和志鄯城東至州百二十里今古鄯驛在府東南二百六十里是作者東西且不知何暇論其他哉唐之鄯城縣志稱其北枕湟水今湟水東南流至俱爾灣乃北流其地在西寧府西一百二十里疑卽鄯城故城地也河源軍西六十里有臨番軍大中四年尙婢婢遣兵據臨番城拒論恐熱於白土嶺不利復遣將據羗牛峽以拒之卽此羗牛峽卽唐之宣威軍後又譌爲貓牛城宋元祐二年趙元昊攻吐

蕃貓頭城是也崇寧收復仍置宣威軍於峽口四年夏人合羌部逼宣威軍執知州高永年焚大通橋尋廢臨番西六十里爲白水軍又西南六十里至定戎軍又南隔澗七里卽吐蕃之石堡城矣

石堡城府西南三百里羸本吐蕃鐵仞城唐咸亨中取其地後復失之開元十七年信安王禕出隴西拔石堡城初吐蕃陷石堡城留兵據之侵擾河右禕引兵深入急攻拔之乃分兵據守要害令虜不得前自是河隴諸軍遊奕拓境千餘里更命石堡城曰振武軍宋白曰石



堡城四面懸崖數千仞石路盤曲長三四里西至赤嶺三十里今本元和記作振威軍當從元和記爲是二十九年吐蕃攻承風堡又襲攻振武蓋嘉運不能守大寶四載皇甫惟明攻之不克六載詔王忠嗣攻之忠嗣言石堡險固吐蕃舉國守之今頓兵其下非殺數萬人不能克請俟其有釁然後取之不聽遣將軍董延光將兵攻取命忠嗣分兵助之果不克八載哥舒翰復攻石堡其城三面險絕惟一徑可上吐蕃以數百人守之唐兵死者數萬僅而克之遂以赤嶺爲西塞開屯田備軍實

西域考古錄

卷二

三

更以其軍爲神武軍又謂之天威軍至德初復沒於吐蕃劉元鼎謂其崖壁峭立道回屈是也又承風嶺在振武軍西七十里儀鳳三年李敬元敗於青海還頓承風嶺阻泥溝自固賊屯兵高岡以壓之別將黑齒常之引軍襲擊其營賊敗遁去開元二十九年吐蕃攻承風堡又襲攻振武軍卽此宋白曰廓州至故吐谷渾界承風嶺百九十里蓋在積石軍東北五十里也

伏俟城在青海西今爲蒙古游牧地本吐谷渾國都也北史吐谷渾傳夸呂始稱可汗居伏俟城後周建德五

年春遣太子贊伐吐谷渾至伏俟城而還隋大業五年  
伐吐谷渾別將劉權至青海乘勝追奔至伏俟城因置  
西海郡統縣二曰宣德曰威定貞觀八年李靖帥諸軍  
次伏俟城又其西曼頭山北曰樹惇城亦吐谷渾舊都  
也犬戎樹惇所居因名西魏末突厥假道涼州以襲吐  
谷渾宇文泰使涼州刺史史寧隨之至番禾吐谷渾覺  
之奔南山史寧曰樹惇賀真二城吐谷渾之巢穴也拔  
其根本餘衆自散遂與突厥分道趨之突厥從北道寧  
從南道大破之與突厥會於青海唐天寶九載關西遊

西域考古錄

卷二

三

奕使王難得擊吐蕃克五橋拔樹敦城以難得爲白水  
軍使樹敦城近白水軍也白水軍在西寧西北二百三  
十里與安人軍犄角安人在西寧正西二百四十里開  
元二十九年吐蕃寇安人軍渾厓峯騎將臧希液破却  
之又西百里羸爲威戎軍續通典威戎軍城在星宿川  
西東至州三百五十里星宿川卽星宿海也其西有烏  
海柏海十道圖大非川在青海南烏海星宿海柏海並  
在其西互相灌注貞觀八年李靖敗吐谷渾於大非川  
咸亨初薛仁貴爲邏婆道行軍總管與郭待封討吐蕃

至大非川將趣烏海以烏海險遠議留輜重於大非川  
嶺上爲兩柵以守之待封不從仁貴前行破吐蕃於河  
口進屯烏海以俟待封待封將輜重徐進爲吐蕃所敗  
仁貴還屯大非川吐蕃就擊之死傷畧盡又開元十四  
年吐蕃大將悉諾邏寇大斗拔谷進攻甘州焚掠而去  
王君奐度其兵疲勒兵躡其後會大雪虜凍死者甚衆  
自積石軍西歸君奐先遣人間道入虜境燒道旁草悉  
諾邏至大非川欲休士馬而野草皆盡馬死過半君奐  
及之於青海之西乘冰而度悉諾邏已去破其後軍獲

西域考古錄

卷二

三

其輜重羊馬萬計而還通鑑注曰河口積石河也自唐  
鄯州鄯城縣西行三百餘里卽大非川矣烏海在河源  
郡漢哭山西李靖等伐吐谷渾歷破邏真谷追及其王  
伏允於烏海大破之吐蕃使臣仲琮曰吐蕃居寒露之  
下物產寡薄烏海之際盛夏積雪暑旣冬裘隨水草以  
牧是也通典吐蕃國出鄯城五百里過烏海暮春之月  
山有積雪地有冷瘴令人氣急不甚爲害新唐書破邏  
真谷去烏海二千餘里謬矣貞觀十五年江夏王道宗  
持節送文成公主吐蕃贊普親迎於柏海蓋自積石西

南歷星宿川烏海柏海已深入吐蕃北境矣

罕東衛在西寧西北三百里羸青海東北洪武中其酋鎖南吉刺思入貢詔置罕東衛以其酋爲指揮僉事給金牌歲以馬易茶互市衛無城郭官室以羶帳爲廬逐水草遊牧俗與蒙古同與曲先安定阿端等三衛輔車相依各守分地至正德時亦不刺襲據青海罕東遂遭蹂躪相率內徙西寧或沿邊流爲生番爲降夷衛遂爲甌脫矣至罕東左衛爲罕東部人奄章初與種族不相能率其部避地甘州界中朝廷姑息許其住牧及沙州

西域考古錄

卷二

三

衛全部內徙奄有其地成化中奄章之孫只克畏土魯番之逼請立衛如罕東例以扞西陲部議以哈密旣亡沙州更無人統領勢必爲土魯番所併將不可復制而西鄙益危乃允所請於沙州故衛置罕東左衛蓋二衛同族其地則相距幾二千里許諸書不能考辦譌以二衛爲一卽留心邊事如邱濬淹博如楊慎亦不能部居別白邊荒考據難言之矣

顧氏紀要亦譌以二衛爲一衛也

曲先衛在

西寧西北三百三十里直罕東衛北大通河南元設曲先答林元帥府元初忽必烈將兵擊大理自曲先腦兒

而南卽此洪武時其酋入貢命設曲先衛以酋長爲指揮後遭朶兒只巴之亂併入安定居阿真川永樂初復置衛移置藥王窪地洪熙時以部人散卽思劫殺朝使懼討遠遁宣德初天子赦其罪招使復業者四萬二千帳正德中北部阿爾禿斯亦不刺入青海諸部爲所掠逃徙窮荒或竄入哈密土魯番海孺沃土遂讓之蒙古矣

安定衛在西寧西南四百里曲先之西南也本名撒里畏兀兒廣袤千里水草甚美元封哈忽失里爲武威郡

西域考古錄

卷二

三

王遷揚州樂戶數族賜之久之其人同於夷俗惟養犬豕以自別明初哈忽失里後人烟帖木兒封寧王者入貢因遣官厚賜其王慰籍之分其境內爲四部曰阿端曰阿真曰帖里曰若先凡屬蒙古皆爲阿端阿真以別於樂戶明年以故元印綬金銀字牌來上請置衛從之改封烟帖木兒爲安定王置安定阿端二衛以其部酋沙刺等爲指揮千百戶各有差十年王爲沙刺所弑番將朶兒只巴與之爭權相軋大肆殺掠遁入沙漠陝西都司以兵入定其亂二十九年乃從肅王請復立衛官

其酋長五十八人爲指揮千百戶以王之孫亦攀丹襲  
王賜印誥還治其地洪熙初指揮使散哥與曲先部散  
卽思劫朝使都指揮李英討之窮追至大積石山敗其  
衆斬級二千餘其後北部據西海四出剽畧安定阿端  
首當其衝部衆散亡幾盡衛遂空虛樂戶之後爲若先  
爲帖里分地寬而人戶衆及避夷患二族俱徙入西寧  
近邊阿端衛在西寧之南五百里其先蓋韃靼別部與  
安定之人同屬烟帖木兒者也明初欵塞來朝分阿端  
阿真二部其後置衛合阿真爲一中馬互市同之三衛  
西域考古錄

卷二

三

正德以後日以削弱不知所終

